

DET BEIBI JISAS BIN BON

(LUK 1:26-38 EN 2:1-20 EN METHYU 2:1-12)

STORIMEN

EINJUL

MERI

JOSEF

OLA PIPUL HUBIN WOK LA BETHLAHEM

ELISABETH – JIDAN FEMILIWEI 6 MANTS

BULIGI

STAKMEN

SHIP

JISAS – BEIBI (REPDIMAP IM GARRAM SPESHALWAN KLOS

AGASTAS - HAIBALA GABMAN BOS

KLEBABALA MEN

KING

SERRAMONIMEN EN OLA LOWA MEN

STORIMEN:

Bambai na wen det olgamen Elisabeth bin jidan femiliwei 6 mants, God bin jandim det einjul neim Geibriyal langa Nesareth, dumaji imbin abum wed bla wan gel deya neim Meri. Det gel bin pramis langa wan men neim Josef. Bat det gel nomo bin merrit yet.

EINJUL:

“Meri, God im laigim yu brabli, en im jidan garram yu. Yu nomo bradin, Meri, dumaji God im brabli gudbinji langa yu, en yu garra abum boiwan beibi en yu garra gulum im neim Jisas. Im garra jidan brabli haibala, en dei garra gulum im san blanga det brabli haibala God.

MERI:

“Mi yanggel. Ai nomo bin silipsilipbat garram eni men. Hau ai garra abum beibi?”

EINJUL:

“Det Holi Spirit garra kaman, en Godawa garra jidan langa yu. Lagijat na yu garra faindim det beibi, en blanga tharran na det beibi im speshalwan, en dei garra gulum im God san.

“Wal yu jinggabat Elisabeth yu rileishan na. Im kaan abum beibi, dumaji im brabli olgamen. Bat imbin jidan femiliwei 6 mants na, dumaji God gin dum enijing.”

MERI:

“Wal mi wekingel blanga God. Im na main bos.”

EKSHON: En det einjul bin gowi.

STORIMEN

Wal wan haibala gabman bos neim Agastas bin wandi kaundimap ola pipul langa ebri kantri, en ebribodi bin lafta go langa olabat ron kantri en gibit olabat neim langa detlot gabman wekinmen deya.

Wal Josef bin oldei jidan langa det lilwan taun gulum Nesareth, bat Josef en Meri, det pramiswan waif bla im, bin lafta go langa Bethlahem, en Josef bin lafta go deya dumaji im grengrenfatha olabat bin kamat brom det taun na.

Wal Meri bin jidan femiliwei, en det taim blanga im bin kaman deya langa Bethlahem en imbin abum det feswan beibi blanga im.

Lilboi imbin abum, en imbin repdimap im garam speshalwan klos, en imbin lafta pudum im langa det pleis weya ola buligi bin oldei idimbat daga, dumaji loda pipul bin silip insaid langa det haus en nomo eni rum bin deya.

Wal sambala stakmen bin maindimbat ship gulijap langa Bethlahem, en wanbala einjul brom God bin kamat langa olabat, en deibin brabli braidin.

EINJUL

“Yumob nomo braidin. Aibin kaman blanga dalim yumob gudnyus, weya garra meigim ebribodi brabli gudbinji. Tudei na det beibi bin bon. Im neim Jisas Krais, en im garra deigidawei ola nogudbala ting brom yumob. Trubala ai dalim yumob. En yumob garra faindim det beibi silip deya langa det pleis weya ola buligi oldei idimbat daga.”

EKSHON: Bigmob einjul bin jandap streidawei

BIGMOB EINJUL:

“God im nambawan! Im na garra meigim yumob jidan gudbalawei, dumaji im laigim yumob brabliwei.”

STAKMEN:

“Wi lafta go langa Bethlehem en lukabat det beibi weya God bin dalim wi.”

STORIMEN:

En deibin go, en deibin faindim Meri en Josef, en det beibi, en wen deibin luk det beibi, deibin dalim ola pipul wanim det einjul bin tok blanga im.

En det beibi mami bin oldei jinggabat detlot wed brabliwei weya detlot stakmen bin dalimbat olabat.

Afta na detlot stakmen bin gobek, en deibin gigit theingks langa God blanga det beibi weya deibin luk. Deibin gigit theingks langa God blanga ebrijing deibin lisin en blanga ebrijing deibin luk, dumaji detlot wed weya det einjul bin dalim olabat bin trubala.

Pat 2

Klebabalamen bin kaman langa Jisas

STORIMEN:

Wal det taim na wen Jisas bin bon langa Bethlahem, deya langa Judiya, det king blanga det kantri bin neim Herod. Deibin abum sambala klebabalamen langa det najawan kantri sanraiswei hubin oldei lukinatbat ola sta, en deibin luk wanbala speshalwan sta bin kamat. Deibin sabi det sta bin kamat blanga shoum ola pipul Jisas bin bon.

Wal detlot klebabalamen bin go langa Jerusalem, en deibin askim ola pipul,

KLEBABALAMEN:

“Weya det beibi bin bon hu garra jidan king blanga ola Juwish pipul? Melabat bin kaman brom longwei blanga weship im, dumaji melabat bin luk det sta blanga im bin kamat sanraiswei.”

STORIMEN:

Wal wen King Herod bin lisin langa det nyus, imbin brabli nogudbinji, en loda pipul deya langa det taun bin nogudbinji du.

Wal det king bin jingat langa ola haibala serramonimen en ola lowamen, en wen deibin kaman langa im, imbin askim olabat,

KING:

“Weya det beibi yumob gulum Krais garra bon?”

OLA SERRAMONIMEN EN OLA LOWAMEN:

“Im garra bon langa Bethlahem. Melabat sabi tharran, dumaji longtaim wan speshalwan mesinja blanga God bin tok langa oltestaman blanga dijan ting.

⁶Imbin tok, ‘Nomeda Bethlahem im lilwan taun, bat stil im brabli speshalwan pleis langa Judiya, dumaji brom Bethlahem na det bos garra kamat, en im garra lidim ola pipul blanga God.’”

STORIMEN:

Lagijat na detlot serramonimen en lowamen bin tok langa det king.⁷ Afta na det king bin abum snikinwan miting garram detlot klebabalamen hubin kaman brom det kantri sanraiswei,⁸ en wen imbin faindat wotaim deibin luk det sta, imbin dalim olabat laiya.

KING:

“Yumob go lida langa Bethlahem, en yumob lukabat det lilboi, en wen yumob faindim im, yumob garra kambek en dalim mi, dumaji ai garra go langa im en weship im du.”

STORIMEN:

Wal detlot klebabalamen bin gowei brom det king. Deibin bulurrum det seimwan sta en wen deibin luk det sta, deibin gudbinji brabli. Det sta bin go lida langa olabat olawei raidap det sta bin jandap ontop langa det pleis weya det lilboi bin jidan.

¹¹Wal wen detlot klebabalamen bin kamat langa det haus weya det lilboi bin jidan, deibin gowin insaid, en deibin faindim det lilboi garam im mami, en deibin nildan langa det lilboi, en deibin weship im, en deibin gibit im ebrijing. Gol en dubala gudsmelwan medisin deibin gibit im.

¹²Brom deya God bin gibit woning langa detlot klebabalamen langa drim.

GOD:

"Yumob nomo gobek langa King Herod."

STORIMEN: En deibin lisin langa God, en deibin gobek langa olabat ron kantri najawei.